

tempenda Silva, ita ut in circuitu amplius septem passuum milla pateat : & tot in ea sunt Vrbes, Pagi, Abbatia & Monasteria, ut miraculum videatur : ideoque non pauci æstate Nobiles & Cives honestiores cum tota familia se eo recreationis gratia conferunt ibique ad septimanas tres aut quatuor remanent. *Saventerio*, *Lovanio*, *Bruxella* & *Vilvordia* includitur. Silva amœnissima est, nomenque accepit a *Saventria* pago illi adjacente. *Grootenhout* itidem *Brabantia* Silva est, non multum supra *Turnholtum* sita, in qua nascitur fluvius *Ada*, qui postea in *Flumen Netham* se exonerat. Silva est magna, in qua *Regina Maria*, ad quam *Turnholtum* pertinebat, multum venari solebat. *Marlaigne* *Namurci* silva, prope *Namurcum* Urbem initium fumens : & ingenti latitudine ad ventum *Africum* porrecta, *Philippopolin* versus : prope *Mosam* usque se extendit. *Niepe* *Flandria* silva primaria, non procul ab *Artesia* finibus, duobus a *Flumine Lisa*, *Castello Morinorum* & *Baliolo* distat milliaribus, quamvis diversis sui partibus : amœna est, ampla, & antiquissima Silva, arcem & opere, & *Natura* continens munitissimam. *Nomen* itidem in *Flandria* sita est, ac prope *Hipram* maxima in *Septentrionem* latitudine se extendens multos Pagos, & Abbatias nonnullas complectitur. *Poedbergia*, silva inter *Flandriam* & *Hannoniam* non procul a *Gerardimontio* & *Lessa*, magna est, & ob rotunditatem jucunda. *Guilielmi*-Silva in *Artesia* posita est, prope *Rentiacum*, ubi pugnam *Imperator* cum *Gallia* Rege commisit, anno *MDLIV*. *Engelwallia*, *Geldria* prope *Arnhemum*, Silva amœna, in ventum *Hellespontium* vergit. *Septem-Silva*, sunt VII ingentes & *Trans-Isalanis* finitimæ Silvæ, quæ uni ex quatuor *Frisia* partibus nomen dederunt, quæ hodie dicitur *Sevenwolden*, quasi dicas *Septem-Silva* : quarum singula multum spatii continent, & pagos plurimos ad spectui jucundissimos. Sed hæc hæcenus de Silvis. Ad Opera publica venio. Innumera in hisce regionibus magnifica Tempia, plurimæ Abbatia, innumera Cœnobita & Monasteria, plurima Xenodochia, Nosocomia, Ptochodochia & Orphanotrophia. Certe in una urbe *Antverpia* duo & quadraginta ejusmodi loca numerantur : interea augustissimum, Templum *Cathedrale D. Virginis* capacissimum, cum Turri excelsa ccccxx pedum, ex candido Marmore, ex qua prospectus in urbem opulentissimam, in Fluvium navibus testum, in vicinam regionem pagis urbibusque abundantem, amœnissimus pater. Quid reliqua Tempia, Monasteria, & ejusmodi loca describam, quæ hic & in aliis urbibus & pagis magno numero conspiciuntur? Quid Ducum Comitumque & Illustrum Procerum sumtuosa Palatia? Quid reliqua tum publica tum privata Ædificia? ea si commemorare pergam tempus me citius & locus quam materia deficiat. Quare de his silere melius quam parum dicere. Status harum Ditionum Politicus, ut de eo etiam non nihil dicamus tam generatim quam speciatim fere triplex est : Primus est Ecclesiasticus, in quo præcipui sunt Abbates. Secundus Nobilitatis, ut sunt Duces, Comites, Margravii, Principes, Barones & magni Domini. Tertius Civitatum, quem primariae cujusque Ditionis Civitates representant. Hi Status a Principe convocantur, quoties de rebus ad Principem, aut ad Principatum, aut ad conservationem & utilitatem ditionum pertinentibus deliberandum est. Status vero Ecclesiasticus ita se habet: Quatuor sunt in

Opera publica.

Ratio gubernandi.